

Sumbangan swasta penting untuk negara

B.H 24 AUG 1993

UCAPAN Perdana Menteri Datuk Seri Dr Mahathir Mohamad di majlis penyampaian hadiah Esso untuk negara sempena majlis penutup perayaan 100 tahun Esso Malaysia di Kuala Lumpur, semalam.

SAYA mengucapkan terima kasih kepada Esso kerana menjemput saya ke majlis penyampaian 'Hadiah Esso Untuk Negara' dan seterusnya merasmikan majlis penutup perayaan 100 tahun Esso pada hari ini.

Tahniah juga kepada Esso Malaysia kerana hari jadinya yang ke-100. Semoga Esso akan kekal beroperasi di negara ini. Sepanjang 100 tahun lalu, Esso bukan saja menyumbang terhadap pembangunan industri petroleum dan gas di negara ini tetapi juga terhadap pembangunan negara. Kerajaan menghargai sumbangan Esso dan berharap ia akan berterusan.

Saya difahamkan Esso mula beroperasi di negara ini dengan menjual minyak tanah atau 'kerosene' di Pulau Pinang pada 1893. Bermula dengan perniagaan secara kecil-kecilan ini, Esso berkembang pesat untuk menjadi pengeluar minyak mentah yang terbesar di Malaysia pada hari ini. Saya berasa gembira bahawa Esso melabur sebanyak RM16 bilion di negara ini iaitu setakat ini satu jumlah yang besar mengikut sebarang 'standard'.

Malaysia memang menggalakkan pelaburan asing ke negara ini. Dalam usaha ini, kita menyediakan pelbagai insentif dan kemudahan infra-

struktur. Kita juga sering menambah serta meningkatkan kemudahan infrastruktur bagi menampung pelaburan baru. Usaha ini mendatangkan kejayaan dan ini terbukti dengan adanya pelbagai jenis industri, termasuk industri berat dan canggih di negara ini.

Di samping mengekalkan kestabilan politik negara, kerajaan akan terus menyediakan kemudahan-kemudahan bagi menampung keperluan pelaburan. Bagi Malaysia, pelaburan adalah nadi pembangunan dan kemajuan negara. Di zaman teknologi tinggi dan canggih ini, mana-mana negara yang enggan atau lewat memperolehinya akan tertinggal dan tidak dapat dibangunkan. Malaysia tidak mahu ketinggalan. Justeru itu, kita harus memasuki industri yang berteknologi tinggi dan canggih ini.

Bagi Malaysia pelabur asing dianggap rakan pembangunan atau 'partners in development'. Sungguhpun pelabur melabur kerana ingin membuat keuntungan, hakikatnya ialah melalui pelaburan mereka menyumbang kepada pembangunan negara. Apabila mereka berjaya dan membuat keuntungan, kerajaan turut mendapat faedah melalui cukai. Di samping itu, pada hari ini

Bagi Malaysia, pelaburan adalah nadi pembangunan dan kemajuan negara. Di zaman teknologi tinggi canggih ini, mana-mana negara yang enggan atau lewat memperolehinya akan tertinggal dan tidak dapat dibangunkan

banyak syarikat asing yang turut menyumbang kepada masyarakat setempat melalui program-program kemasyarakataannya atau 'community development programmes'. Ini adalah sebahagian daripada tanggungjawab korporat mereka. Dengan adanya pelaburan, peluang pekerjaan bagi rakyat di negara ini diwujudkan dan ini menolong mengatasi masalah pengangguran. Dalam erti kata yang lain, pelaburan dari luar negara menolong proses membasmi kemiskinan dan membangunkan negara.

Kini, dalam usaha negara menuju ke arah pembangunan perindustrian yang lebih pesat, kerajaan mengalu-alukan penubuhan industri-industri berteknologi tinggi yang akan mendedahkan rakyat kepada kepakaran serta teknologi baru. Dalam hal ini, Malaysia ber-

harap negara maju yang melabur di negara ini akan berusaha meminidahkan teknologi tinggi mereka ke negara ini. Dalam dunia yang saling bergantung antara satu sama lain, membantu mempercepatkan kemajuan sesebuah negara akan membawa manfaat kepada semua yang terbabit. Ini kerana apabila sesebuah negara itu menjadi maju, negara pelabur boleh menjual lebih banyak barangan kepada negara tersebut.

Sepertimana yang saya katakan tadi, pelabur asing adalah rakan pembangunan kita. Adalah diharapkan falsafah ini akan diterima baik oleh syarikat asing terutamanya syarikat multinasional di negara ini. Usaha yang dijalankan oleh Esso patut dicontohi oleh syarikat multinasional yang lain.

Saya mengalu-alukan

langkah Esso menyumbangkan RM1 juta kepada Perpustakaan Negara. Ini adalah selaras dengan objektif kerajaan supaya terdapat kerjasama erat antara pihak swasta dan kerajaan seperti yang terjalin dalam konsep Persekitaran Malaysia. Sumbangan Esso ini membawa erti yang besar kepada generasi muda negara ini kerana pendidikan dan pengetahuan adalah perkara yang ditekankan oleh kerajaan. Negara memerlukan penduduk yang berupaya mengendalikan teknologi tinggi, berpengetahuan luas, berdisiplin, beramaniah serta berhemah tinggi untuk menghadapi cabaran masa depan. Dalam hal ini, generasi muda kita adalah antara sumber yang terpenting bagi membawa negara ke mercu kejayaan yang lebih cemerlang berdasarkan cita-cita dan hasrat yang dicerminkan dalam Wa-

wasan 2020.

Walau bagaimanapun, dalam mengejar pengetahuan dan teknologi tinggi, kita tidak boleh membelakangkan nilai-nilai murni kita. Kemajuan yang kita idamkan di bawah Wawasan 2020 adalah pembangunan yang seimbang antara materialisme dan kerohanian.

Memanglah wajar kanak-kanak didedahkan kepada pendidikan moral daripada kecil lagi supaya mereka menjadi warga negara yang bukan saja berwibawa dalam segala aspek tetapi juga bermoral tinggi. Dalam kata lain, komponen moral dan etika mestilah menjadi sebahagian yang penting dalam usaha mengejar pengetahuan dan kemahiran.

Di sini saya ingin menyarankan supaya perpustakaan, di samping menyediakan pusat pembelajaran yang berteknologi tinggi, menyediakan

lebih banyak bahan pendidikan moral dalam pelbagai corak, sama ada buku, cakera padat ataupun perisian komputer supaya kanak-kanak kita dapat didedahkan kepadanya dan menjadi rakyat dewasa yang bermoral tinggi. Hanya moral yang tinggi saja yang boleh menjamin segala nikmat dan kemajuan akan berkekalan.

Kanak-kanak yang menggunakan sumber 'hipermedia' ini boleh merujuk kepada bahan-bahan rujukan ini di samping memperoleh maklumat yang lain.

Saya difahamkan bahawa pusat hipermedia teknologi tinggi tajaan Esso ini adalah satu pusat pembelajaran yang berlainan daripada yang lain. Kanak-kanak yang menggunakan pusat ini akan didedahkan kepada pelbagai media membuat sambil mempelajari atau 'hand-on experimentation' dan

berinteraksi dengan teknologi terkini. Saya yakin pusat seperti ini boleh menguji kebolehan serta mencabar keupayaan kanak-kanak dan menyediakan mereka untuk menghadapi cabaran zaman teknologi tinggi dan canggih.

Saya berharap pusat sumber hipermedia ini dapat diperluaskan ke perpustakaan-perpustakaan lain bagi mendedahkan kanak-kanak di luar Kuala Lumpur pada kaedah baru ini.

Sekali lagi saya, saya mengucapkan tahniah kepada Esso atas sumbangan dan berharap ia akan terus berkerjasama dengan kerajaan untuk pembangunan negara dan juga rakyat Malaysia.

Semoga Esso akan terus mencapai kejayaan yang lebih cemerlang di negara ini pada abad-abad yang akan datang.